

K296.1
122
(458:5)

中國方志叢書·華北地方·第四八五號

據

清乾隆五十年刊本
清周璣纂修

影印

河南省

杞

縣

志

(五)

成文出版社有限公司印行

中華民國六十五年 月臺一版

杞縣志

全五冊

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

杞縣志卷之二十一

藝文志一

碑記

舊志叙曰杞夏肄之區也孔子言夏禮以文不足徵而歸咎於杞則文所繫固重矣哉汲古者賴以爲經繹事者抽以爲緒何可少也夫中郎賡志於漢史景文抱恨於中人此杞之巨擘也猶然如此然則半世鏤心一朝溘露亦足悲矣故凡有著作悉錄其目其他篇什有關典故者亦分疏於後俾後之覽者庶幾不苦於無徵云爾

碑記

宋

真宗皇帝幸伊尹廟碑

若夫始就於桀以勸人臣之忠終歸於湯以濟天下之難述宣懿德敷祐萬邦大節昭明嗣王敷其訓餘度不墜令子承其家舊里攸存明祀新享朕言因駐蹕永用懷賢聊復刻銘庶幾旌善贊曰成湯之仁溥率來賓阿衡之忠天輔成功民難旣平嘉謨永貞王室不衰大訓可知蘋蘩之祭傳於永世金石之刻表於褒德大中祥符七年九月十五日立石

元

萬戶張公城杞碑

劉

方

舜澤人御史

歲己酉春杞中父老相率來告予曰當壬辰之變河南破郡縣廢隄防不修翌歲河失故道己亥又決於杞遂播而爲三東涸宋毫間漫漫澶澶下連淮海爲不測淵國朝歲方有事南方梁益兩淮駸駸殆盡南師竊河爲間舳艫千里逆流而上今年焚宋門明年剽平陰至攻孟津俘陳留自庚子以來無寧歲梁鄭騷動父子夫婦不能相相守多流離違方山東亦爲之震駭雖潁河邇戍萬騎號勁利

蓋被左右上下出沒潛詭禦無定所亦嘗夾岸對
列南師方且四顧中流彷徨飽載鼓枻而下亦無
如之何甲辰春班師大將軍偕亞旅暨中書君相杞
爲河衝會謀元師戍其上以扼其喉而難其人僉
曰萬戶張侯可然尙以南人便舟楫雖智勇冠絕
有不可必之疑逮公下車再月而成市三月而成
城五月屯戎有考七月秋潦大至三河合而爲一
環城爲海巨浸稽天南人子櫓萬艘蔽川飛進直
摩吾壘謂莫敢誰何公乃鳴金革結陣以待命甲
騎百人涉水薄之鋒纔數合卽退艤霄無聲以遁

謀人云彼視吾壘乘水連列如砥柱灝灝布爲鰲
鸛魚麗遂此氣奪公丙午北上留後者各有所授
若人稟成算若人謹守禦若人治賓客是歲南師
乘虛四來輒四北俱不出公之方畧初公戍杞也
視中流蕩杞北雉而東且南北河決汴北隄而且
東南河循杞西城而且南以南河之西重地也因
西山爲壘而親壓之以南河舟楫所利洊兩橋以
限之南河之東中流之南戰地也列布三壘竄以
瀕河瀕海善戰善涸者使彼舍舟而陸不能軍其
中流則造舟爲梁以備衝突列岸勁弩飛石以給

水攻中流之北北河之南善地也亦成城時使四方百工商翼流肆優狎畢至以通有無以佐軍用又時其遊暇以忘人勞北河之上通橋一以濟南北之往來至天下豪獷驚黠者叢萃之公得之如梓人作室大小長短咸適其用或至倉卒驅以禦堅敵一如練卒抑憚公之威名也而其穀甲冑銀戈矛調弓矢完壁壘緩則耕急則戰芻蕘儲蓄百度具舉要令耕戰不廢爲久駐之基也夫自諸侯列土以來各自民其民俗其俗其視他邑無異秦人視越人之肥瘠而不相卹也如此杞邊邑也處

於金革羽書交馳之下而吾儕小人再罹庚子之
厄謂禍愈於壬辰今幸與四方之人雜居於部曲
沐公同仁一視中得農其野旅其途工其肆賈其
市而不擾者六年於此俾向疑其不可必者渙然
冰釋矣情感於中求所以答公之德而吾子遊公
之門有日矣敢以此一時方暑勲德請紀錄爲史
筆先刻諸元琰以傳不朽方喜其老人質直而有
禮故實老人之語以錄之公字知剛涿之定興人
不書名以列侯貴之也銘曰南國未收隄防不修
河逆入淮杞居上流南人闕觀敢遡行舟歲擾梁

鄭河南殷憂自公城杞復周六秋梁鄭息肩日復
田疇干城載詠田野吟謳籌邊望遠極目爲樓河
山四顧經史優游管仲祖述葵邱雍邱武夫烈烈
河水悠悠公之用兵鶻鷲虎爭束髮百戰白首彌
精長戈所指前無金城退戍山立隱一敵國嚴城
如春山河改色民張吾軍敵至供億楊劉中渾崇
韜光弼厥績休嘉昇河罔極英聲同飛萬古勇直
歲已酉三月中休日三老李義和等立石

建廨營碑記

傅汝庸

元城人

昔蔡國張武康公駐幕於杞也披剪荊棘始建城

市爲河南重鎮時城居無縣治及武康公拓境於
毫進榮澤惠公來尹是邑市將佐所遺第宅爲今
公廨館傳諸官舍粗完至元歲己丑民火延及廨
舍灰燼者什八九時尹大梁申公涖政乃於事隙
卽其舊區廓庭宇之隘正位置之傍前後廳事左
右六曹庖庫門圉廢者創之故者新之雖壯麗與
曩不類而豐儉得宜制度過之計爲屋大小凡三
十楹有奇羣材巨費仰給於經畫尺木寸甃不資
於科歛民悅時使指期落成竊嘗考之春秋興作
必書以勞民事爲重也新作南門則書之修泮宮

復闕宮則不書譏南門不當爲而宗廟學校雖用民力不可廢也惟公宇亦然况今一炬之餘必不得已而又且不傷財不害民而得其時制此爲縣者能政一端之尤者也今縣長暨令佐不掩人之善具本求請識諸石其存心於撫字而重民事可知矣若夫清謹以律已明正以御下勤恪匪懈共承宣職仁愛惻惻惠單貧之民屏盜息訟敦本抑末興儒育材此鄙俗之所忽慢吾皆以爲急務行之一邑者可爲法於天下受賜之民愛之如親敬之如神歌詠之碑頌之生祠之政成課最身歷臺

省名登簡策傳附循吏班班可紀而垂不朽者視此奚足讓哉其有借公以濟私挾權而害物外釣虛名略無實惠者登斯堂覩斯刻見一善之績在人猶不能忘庶幾愧悟前日之非知善惡易以類應化而爲良有司云至元十二年六月立

譙樓記

楊惠
御史

皇元龍興朔方奄宅函夏聖聖相承誕敷文教仁涵義煦邇底雍熙之盛猗歟休哉然自京師而郡縣其禁姦異防草竊控弦操戈之士晝夜巡邏撞鐘擊鼓未嘗一日撤武備者警戒無虞亦云至矣

杞隸汴爲劇縣且當梁宋之衝民物豐阜訟多事繁爲政者承宣聽決之不暇故於戢盜防姦之舉殆名存而未遑實務也孫侯柟棟由椽河南行省來尹是邑下車誠諮善道惟公惟勤興學勸農御史撫民利病之興除祠宇之增修百廢具舉自宣聖殿廡齋堂以暨門垣易敝以新獨公廨旣完麗譙未建心恒斯歉乃屬僚吏謀之首分俸金以爲倡士民亦視倣施金穀合集楮帛若干萬緡將市荆楊之木汎溯而來以需基構適有縣民史其姓者售居業以備後事第有岑樓且當城市之中外爲

鼓嚴敞宵析侯偕同寅議酬以上直楮帛爲繒者
五萬遂仍其樓洞闢軒闥重葺欄楯加以君襲之
飾徙鼓角於其上樹橫鐘於其側置壺箎謹籌刻
於其中未浹旬而規畫竟不勞力而事功成扁其
楣曰齊政晨瞻夕聞崑崙傾耳相人之視聽爲之
一新而民曾莫與知其由焉侯字世隆南頓人讀
書而文通敏吏事嘗爲考城尉堂河南憲史主江
陵縣簿所至有能聲蓋推忠直仁卹之心發而爲
涖官治民之政必能知本末先後之序卽此一樓
則侯之爲王制設侯度之大端槩可占矣人寧有

時詘舉羸之譏乎將見更籌分明光紹萍鄉必有
御史聞之稱譽美政薦之公朝者是殆侯發軔青
雲之嘉兆歟侯之政化不但相人沾溉旁羣縣之
婚田訟獄積久未白者省府繳侯聽決悉叅牘籍
資左右驗案比以析之兩造悅服其平允三年夏
百穀告旱侯竭虔責已祈羣祠而甘澍沛歲用大
熟且致嘉禾之祥士林咸賦歌詩以讚美之防禁
之條十有三事諭俗之戒十有六則俾大書門壁
朝夕出入以自警俗是用勸善政之多未易殫紀
始舉其概附見於此用諗來哲凡寮采士民耆宿